

明

紀

冊
古

明紀卷第三十五

賜進士出身工部候補主事虞衡司行走陳鶴篔

卹贈知府銜給雲騎尉世職內閣候補中書孫男克家參訂

世宗紀八

起嘉靖三十五年丙辰訖
嘉靖四十年辛酉凡六年

三十五年春正月庚辰彗星見進賢旁長尺許西南指漸至二尺餘
掃太微垣次相東北入紫微垣犯天牀歷七十餘日始滅 壬午官

軍擊倭於松江敗績 二月甲午振平陽延安災 趙文華還朝爲

帝言餘倭無幾因盛毀總督楊宜而薦胡宗憲會御史邵惟中上新

場失事狀己亥奪宜職閒住宜在事僅踰半載故得禍輕文華及嚴

嵩欲用宗憲吏部尙書李默推王誥嵩文華皆恨巡按蘇松御史周

如斗再以敗狀聞帝頗疑文華妄數詰嵩嵩曲爲解默試選人策問

言漢武唐憲以英睿興盛業晚節用匪人而敗文華思以告訐自解

遂奏默誹謗且言殘寇不難滅以督撫匪人敗衄由默恨臣劾其同

鄉張經思爲報復臣論曹邦輔卽嗾夏棡孫濬媒孽臣延今半載疆事日非昨推總督又不用宗憲而用誥東南塗炭何時解陛下宵旰何時釋帝大怒下禮部及法司議奏默偏執自用失大臣體所引漢唐事非所宜言帝益怒戊午下默錦衣衛獄并逮邦輔謫戍朔州責禮部尙書王用賓等黨護默各奪俸三月停誥新命進宗憲侍郎代爲總督張景賢代邦輔阮鶚代宗憲何鼈坐默子罵父律絞帝曰律不著臣罵君謂必無也今有之其加等斬錮於獄默竟瘦死默博學有才辯以氣自豪凡有銓除與嵩爭可否氣甚壯然性褊淺用愛憎爲軒輊頗私鄉舊以恩威自歸士論亦不甚附之默旣得罪繼之者吳鵬歐陽必進視嵩父子意承順惟謹吏部權盡失 初以倭患急特命都督劉遠爲浙江總兵官兼轄蘇松諸郡數月無所爲廷臣爭言俞大猷才三月罷遠以大猷代 呂本署吏部事希嚴嵩指考察廷臣署吏部侍郎葛守禮下考勒致仕後帝問守禮安在左右謬以

老病對帝爲歎息久之 初汪直誘倭入犯倭大獲利各島日至既而多殺傷有全島無一歸者死者家怨直直乃與養子激及葉碧川王清溪謝和等據五島自保島人呼爲老船主胡宗憲與直同鄉里欲招致之釋直母妻於金華獄資給甚厚令客蔣洲陳可願往諭指直見洲等心動又知母妻無恙大喜曰俞大猷絕我歸路故至此若貸罪許市吾亦欲歸耳但日本國王已死各島不相攝須次第諭之因留洲而遣激護可願歸宗憲厚遇激令立功激遂破倭舟山再破之列表宗憲請於朝賜金幣縱之歸 帝以鄭曉知兵夏四月改右都御史協理戎政 丙申振陝西饑 徐海引大隅薩摩二島倭分掠瓜洲上海慈谿自引萬餘人攻乍浦陳東麻葉與俱焚其舟示其黨無還意甲辰賊劫圖山無爲州同知齊恩帥舟師擊之恩子嵩年十八最驍勇敗賊斬百餘級進至安港伏發被圍恩家二十餘人俱力戰死惟嵩等三人獲全賊犯西庵沈莊及清水窪俞大猷董邦政

擊敗之賊走陶山揚州同知朱哀敗賊沙河殲其酋未幾賊復大至
 薄城東門哀督兵奮擊兵潰死胡宗憲壁塘棲與阮鶚相犄角海趨
 阜林鶚遣游擊將軍宗禮擊之崇德縣三里橋三戰三捷辛亥敗沒
 禮驍健敢戰練士三千連破倭既死鶚走桐鄉賊乘勝圍之宗憲計
 曰與鶚俱陷無益也遂還杭州 趙文華既陷李默至死帝以為忠
 進工部尚書加太子太保嚴嵩因薦文華文學宜供奉青詞直內閣
 帝不許東南警蹙至部議再遣大臣督師已命兵部侍郎沈良才矣
 五月乙丑嵩令文華自請行因言江南人矯首望文華帝以為然命
 兼右副都御史提督江南浙江諸軍事 胡宗憲遣指揮夏正等持
 汪激書要徐海降海驚曰老船主亦降乎時海病創意頗動因曰兵
 三路進不由我一人也正曰陳東已他有約所慮獨公耳海遂疑東
 已東知海營有宗憲使者亦大驚二人遂有隙正乘間說下海海遣
 使來謝索財物宗憲報如其請海乃歸俘二百人解桐鄉圍東留攻

一日亦去復巢乍浦阮鶚知不能當海乃東渡錢塘禦他賊 丁亥
左通政王槐採礦銀於玉旺峪 時兩浙皆被倭而慈谿焚殺獨慘
餘杭次之柘林乍浦烏鎮阜林皆爲賊巢前後至者二萬餘人詔胡
宗憲急圖方略慈谿人杜文明被僉爲部長團結鄉勇其子槐傷父
老以身任之數敗倭副使劉起宗令守餘姚慈谿上海槐遇賊定海
之白沙一日戰十三合斬三十餘人馘一酋身被數鎗墮馬死文明
擊賊鳴鶴場亦斬一酋無何追至奉化楓樹嶺亦戰死 六月丙申
俞大猷破倭於黃浦賊陷仙居趨台州副總兵盧鏜破之彭溪 辛
丑俺答三萬騎犯宣府遊擊將軍張紘迎戰敗死 胡宗憲使人語
徐海曰若已內附而吳淞江方有賊何不擊之以立功且掠其舸爲
緩急計海以爲然逆擊之朱涇斬三十餘級宗憲令俞大猷潛焚其
舟海心怖以弟洪來質獻所戴飛魚冠堅甲名劍及他玩好宗憲因
厚遇洪諭海縛陳東麻葉許以世爵海遂縛葉以獻宗憲解葉縛令

以書致東圖海而陰泄其書於海海怒海妾受宗憲賂亦說海於是海復以計縛東來獻帥其衆五百人去乍浦別營梁莊秋七月辛巳官軍焚乍浦巢斬首三百餘級焚溺死稱是海遂刻日請降 帝惑虬仙言手詔問禮部古用芝入藥今產何所尙書吳山博引本草黃帝內傳漢舊儀王充論衡瑞命記言歷代皆以芝爲瑞然服食之法未有傳所產之地亦未敢預擬八月壬寅詔有司採之五嶽及太和龍虎三茅齊雲鶴鳴諸山宛平民獻芝五本帝悅賚銀幣自是來獻者接踵 徐海先期猝至留甲士平湖城外帥酋長百餘胄而入趙文華等懼欲勿許胡宗憲強許之海叩首伏罪宗憲摩其頂慰諭之海自擇沈莊屯其衆莊東西各一以河爲塹宗憲居海東莊以西莊處陳東黨辛亥宗憲令東致書其黨曰督府檄海夕禽若屬矣東黨懼乘夜將攻海海挾兩妾走間道中稍明日官軍圍之海投水死盧鏜亦禽大隅島賊辛五郎至遂俘東五郎徐洪麻葉及海首獻京師

九月鄔景和入賀聖誕因言臣自五世祖寄籍錦衣衛世居北地
今被罪南徙不勝犬馬戀主之情扶服入賀退而私省公主墳墓邱
封翳然荆棘不翦竊自傷悔託命貴主獨與逝者魂魄相弔於數千
里外臣罪重不敢祈恩惟陛下幸哀故主使得寄籍原衛長與相依
許之 土蠻犯遼東指揮劉洪臣等戰死 初徽恭王薨子載瑜嗣
王益以奉道自媚於帝帝命縮其父真人印南陽人梁高輔自言能
導引服食載瑜進之帝已而有隙載瑜嘗壞民屋作臺榭苑囿庫官
王章諫杖殺之又微服之揚州鳳陽爲邏者所獲羈留三月走歸高
輔乘間白之帝會民耿安奏載瑜奪其女下巡撫河南都御史潘恩
等按治恩等盡發其諸不法事乙丑詔廢爲庶人錮高牆載瑜居宮
中所司防守嚴獄詞不得聞及帝遣內臣同撫按至始大懼登樓望
龍亭後有紅板輿歎曰吾不能自明徒生奚爲遂與妃沈氏次妃林
氏皆自縊死子安陽王翊鎡萬善王翊鈞并革爵及未封子女皆遷

開封聽周王約束國除 壬午以平浙江倭祭告郊廟社稷 冬十月丙戌朔日有食之 俺答掠大同邊總兵官孫朝禦卻之 任環乞終制許之環在行間與士卒同寢食所得賜予悉分給之軍事急終夜露宿或數日絕餐嘗書姓名於肢體曰死倭職也爲二親記此髮膚將士皆感激故所向有功 十一月戊午打來孫十餘萬騎深入廣寧總兵官殷尙質等戰死 以平倭功命嚴嵩兼支尙書俸無謝自是褒賜皆不謝嵩直廬隘撤小殿材爲營室帝自十八年葬章聖太后後卽不視朝及居永壽宮大臣益希得見惟嵩獨承顧問御札一日數下同列不獲聞以故嵩得逞志帝又慮廷臣附嵩不盡用其言間取獨斷或故示異同欲以殺離其勢嵩及世蕃獨得帝竅要欲有所救解必順帝意痛詆之而婉曲解釋以中帝所不忍卽欲排陷者必先稱其媿而以微言中之或觸帝所諱以是移帝喜怒往往不失士大夫輻輳附嵩吳鵬及兵部尙書許論輩皆惴惴事嵩文選

郎中萬寀職方郎中方祥號文武管家世蕃剽悍陰賊熟諳中外官
饒瘠險易責賄多寡毫髮不能匿帝於父子素薄裕王既就邸歲時
不得燕見常祿外例有給賜亦不敢請積三歲邸中窘甚王左右以
千金賄世蕃世蕃以屬戶部得并給三歲資然世蕃常自疑一日屏
人問王講官高拱陳以勤曰聞殿下近有感志謂家大人何拱故爲
謔語以勤正色曰國本默定久矣生而命名從后從土首出九域此
君意也故事諸王講官止用檢討今兼用編修獨異他邸此相意也
殿下每謂首輔社稷臣君安從受此言世蕃稍自安 有倭船自浙
直敗還漂入朝鮮國王李峘遣兵擊殲之以所得中國被俘及助逆
者三十餘人來獻 廣東新興新寧恩平間多高山叢箐亡命陳以
明等誘諸徭爲亂衆至萬餘人流劫高要陽江諸縣數敗官軍總兵
官靖遠伯王瑾與巡撫都御史談愷檄諸路土兵誅以明諸巢悉平
瑾驥之元孫也 打來孫復以十萬騎屯青城分遣精騎犯一片石

三道關總兵官歐陽安拒卻之 十二月召趙文華還文華既寵貴志日驕事上官及嚴世蕃漸不如初諸人憾之 徐海既平浙西倭悉靖獨寧波舟山倭負險官兵環守不能克土兵狼兵悉已遣歸四川貴州所調麻寮大刺鎮溪桑植兵六千始至俞大猷乘大雪帥以攻賊賊死戰殺土官一人諸軍四面競進焚其柵賊多死其逸出者盡殪之 丁未俺答五千騎犯環慶爲都督袁正所破其掠莊涼者守將邀斬百二十人 東南倭患已四年朝議練鄉兵禦賊浙江參將戚繼光請期三年而後用之台州知府譚綸亦練千人立束伍法自裨將以下節節相制分數旣明進止齊一未久卽成精銳 以趙文華言特設福建巡撫

三十六年春正月命阮鶚爲之胡宗憲兼浙江巡撫事 二月俺答

以二萬騎分掠大同邊殺守備唐天祿把總汪淵 陸炳劾司禮中

官李彬侵盜工所物料營墳墓僭擬山陵與其黨杜泰並論斬籍其

貲銀四十餘萬金珠珍寶無算炳任豪惡吏爲爪牙悉知民間銖兩
奸富人有小過輒收捕沒其家積貲數百萬巖嵩巖世蕃盡攬六曹
事炳無所不關說文武大吏爭走其門歲入亦不貲營別宅十餘所
莊田徧四方結權要周旋善類舉無所吝勢傾天下然折節士大夫
未嘗構陷一人大獄數起多所保全以故朝士多稱之者 三月癸

丑把都兒擁衆數萬入流河口犯永平及遷安副總兵蔣承勛力戰
死別部入瀋陽鄉兵金仲良禽其長討賴吉能寇延綏殺副總兵陳
鳳 廣東扶黎葵梅諸山峒馮天恩等據險爲寇數十年王瑾復督
軍分道進勦破巢二百餘 初帝器王忬才甚眷之及所部屢失事
則以爲不足辦寇夏四月諭巖嵩與兵部計防守之宜嵩言流河口
邊牆有缺故寇乘之入宜大脩邊牆且令忬補選額兵操練戰守不
得專恃他鎮援兵部條六事如嵩指帝乃下詔責忬赦其罪實主兵
減客兵如議於是練兵之議起 致仕南京吏部尙書朱希周卒年

八十四贈太子少保諡恭靖希周性恭謹不妄取子父各文希周瀕
沒屬諸子曰他日儻蒙易各典勿犯我家諱竟如其志 丙申奉天

殿災延燒華蓋謹身二殿文武二樓奉天左順右順午門及午門外
左右廊盡燬越日乃熄壬寅下詔引咎脩齋五日止諸司封事停刑

倭犯如臯海門攻通州五月癸丑朔掠揚州高郵陷寶應犯徐州
入山東界 癸亥採木於四川湖廣 辛未倭犯天長盱眙遂攻泗

州南京兵部尙書張整檄參將劉顯防浦口丙子賊犯淮安府六月
乙酉顯測賊將遁偕兵備副使于德昌追擊至安東方暑顯被單衣

帥四騎誘賊伏精甲岡下賊出斬一人所乘馬中矢下拔其鏃射殺
追者誘至岡下大敗之賊出所俘女子蠱將士顯悉送有司明日伺

賊出潛燬其舟賊敗走舟舟已焚死者無算 俺答突犯宣府馬尾
梁參將祈勉戰死 甲午罷廣西曠 秋七月庚午詔廣東採珠

初方士王金以仙酒獻趙文華文華獻之帝帝飲之甘使小璫再索

之不應帝遣使賜文華值其醉拜跪不如禮西苑造新閣不以時告成帝一日登高見西長安街有高臺問誰宅左右曰趙尚書新宅也旁一人曰工部大木半爲文華作宅何暇營新閣三殿災帝欲建正朝門樓責成甚亟文華猝不能辦帝積怒且聞其連歲視師黷貨要功狀思逐之八月諭嚴嵩曰門樓庀材遲文華似不如昔嵩力爲掩覆且言文華觸熱南征因致疾宜增侍郎一人專督大工帝從之文華因上疏稱疾請賜假靜攝旬月帝手詔曰大工方興司空是職文華既有疾可回籍休養制下舉朝相賀時帝怒猶未解而言官無攻者會文華子錦衣千戶懌思以齋祀停封章日請假送父帝遂發怒黜文華爲民戍懌思邊衛以禮科失糾劾杖給事中謝江等六人於廷削其籍文華故病蠱及遭譴臥舟中意邑邑不自聊一夕手捫其腹腹裂臟腑出遂死 沈鍊之謫保安也賈人某詢知其得罪故徙家舍之里長老日致薪米遣子弟就學鍊皆語以忠孝大節塞外人

素慙直又稔知嚴嵩惡爭詈嵩以快鍊鍊縛草爲人象李林甫秦檜
及嵩醉則聚子弟攢射之或蹕騎居庸關口南向戟手詈嵩復痛哭
乃歸語稍稍聞京師許論督宣大常殺良民報功鍊貽書誚讓及嵩
黨楊順爲總督被寇破四十餘堡順懼益縱吏士遮殺避兵者鍊責
之加切又作文祭死事諸人詞多刺順順走私人白嚴世蕃言鍊結
死士擊劍習射意叵測世蕃以屬巡按御史李鳳毛鳳毛謬謝曰有
之已陰散其黨矣旣而代鳳毛者路楷亦嵩黨也世蕃屬與順合圖
鍊會官軍捕獲白蓮教妖人閻浩等詞所連及甚衆順喜謂楷曰是
足以報嚴公子矣竄鍊名其中誣浩等師事鍊聽其指揮論長兵部
覆如其奏九月癸亥斬鍊宣府市戍其子襄極邊予順一子錦衣千
戶楷待銓五品卿寺順曰嚴公薄我賞豈意未愜耶取鍊子衮襄杖
殺之復移檄逮襄及其幼弟裘將斃之獄會順楷以他事逮乃免
戊辰彗星見天市垣列肆旁東北指月餘乃滅 俺答子辛愛入大

同右衛境掠應州朔州攻毀七十餘堡殺擄甚衆 冬十月廷議以倭擾江北督漕都御史不暇辦寇請特設巡撫乃命李遂以故官撫鳳陽四府時淮揚三中倭歲復大水且日役民輓大木輸京師遂至請鑲增兵恤民節用次第畫戰守計 蔣洲在倭中諭山口豐後二島主源義長源義鎮還被掠人口具方物入貢胡宗憲以聞詔厚賚其使遣還義鎮等以中國許互市喜遣夷目善妙等四十餘人隨汪直來市至舟山之涿港浙人聞直以倭船至大驚巡按御史王本固亦言不便廷臣謂宗憲且釀東南大禍直遣汪激詣宗憲曰我等奉詔來將息兵安境謂宜使者遠迎宴犒交至今威陳軍容禁舟楫往來公給我耶宗憲慰勞甚至指心誓無他善妙等見盧鏜於舟山鏜令禽直以獻語洩直益疑宗憲令直子以書招直直曰兒何愚也汝父在厚汝父來闔門死矣宗憲開諭百端直終不信曰果爾可遣激出吾當入見宗憲立遣之直又要一貴官爲質宗憲卽命夏正往初

宗憲預爲赦直疏引激入臥內陰窺之激語直疑稍解十一月直偕葉碧川王清溪入謁宗憲大喜禮接之甚至令謁本固於杭州本固下直等於獄宗憲疏請曲貸直死俾戍海上繫番夷心本固爭之強而外議疑宗憲納賊賂宗憲懼易詞以聞直論死碧川清溪戍邊激與謝和遂支解正焚舟柵舟山阻岑港而守俞大猷戚繼光等四面圍之賊死鬪將士苦仰攻先登者多陷沒 辛愛有妾曰桃松寨私部目收令哥懼誅來降楊順詡爲奇功致之闕下辛愛來索不得乃縱掠大同諸墩堡丁丑圍右衛城數匝順懼詭言敵願以趙全邱富來易許論以爲便乃遣桃松寨夜逸出塞給之西走陰告辛愛辛愛執而戮之 十二月致仕工部尙書蔣瑤卒 免山東浙江被災稅糧 琉球世子尙元擊倭海中獲中國被掠者六人因貢使來還 三十七年春正月癸酉罷河南礦 辛愛狎知楊順無能圍右衛益急故將尙表以餽饟入圍城悉力捍禦粟盡食牛馬撤屋爲薪士卒